

## VIJESTI



## Referendum za homogenizaciju

Pravni ekspert i profesor ustavnog prava dr. Kasim Trnka smatra da usvajanje Zakona o referendumu i građanskoj inicijativi u RS-u vodi daljnjoj nacionalnoj homogenizaciji, po već viđenoj "matrici", te da suštinski predstavlja antiustavan i antidejtonski akt.

Ne dovodeći u pitanje formalnu stranu spomenutog zakona, Trnka upozorava kako prilikom sagledavanja implikacija toga akta treba razlikovati kratkoročni interes vladajuće strukture u RS-u, odnosno skretanje pažnje s teške ekonomske situacije, te dugoročni, strateški cilj koji se tiče samog statusa entiteta RS.

Dr. Trnka je govoreći na redovnoj sesiji Asocijacije nezavisnih intelektualaca Krug 99 u Sarajevu o temi "Referendum - iskustva, zloupotrebe, legalitet" elaborirao historijsku genezu i značenje legitimiteta i legaliteta referenduma kao demokratskog instituta, prenosi Fena.



## Američka delegacija u BiH

Danas će članovi Predsjedništva Bosne i Hercegovine primiti delegaciju Sjedinjenih Američkih Država predvođenu kongresmenom Earlom Pomeroyem. Kongresmen Pomeroy iz Sjeverne Dakote, doputovao je sinoć u Sarajevo, a danas će se susresti i sa predsjedavajućim Vijeća ministara Nikolom Špirićem, saopćeno je iz Špirićeva kabineta.

Također, danas se u Sarajevu očekuje i dolazak senatora iz Ohiaa Georga Voinovicha, te senatorke Jeanee Shaheen iz New Hampshirea.



## SDP BiH: Pravda

Socijaldemokratska partija Bosne i Hercegovine danas u sali Gradskog vijeća Grada Sarajeva organizira javnu raspravu o temi "Pravda", saopćeno je iz Ureda za odnose s javnošću ove stranke.

Uvodničarka na skupu bit će Lidija Korać, članica Predsjedništva BiH.

Rasprava počinje u 18 sati.



# NAŠA TEMA Nakon izjave Vuka Između Kos

• **Politika vojne neutralnosti neće se mijenjati,**  
poručio ministar vanjskih poslova Srbije

Daniel OMERAGIĆ

Srbija neće poduzimati korake koji vode prema svrstavanju u NATO ili u bilo koji drugi vojni savez, izjavio je prije nekoliko dana ministar vanjskih poslova te zemlje Vuk Jeremić.

Ovaj stav iznio je pred novinarima tokom međunarodne konferencije o sigurnosti održane u Munchenu. Međutim, potvrdio je da će uprkos takvoj odluci Srbija saradivati sa NATO-om i svim ostalim akterima koji su zainteresovani za održavanje sigurnosti i stabilnosti na području jugozapada Evrope, prenijeli su mediji.

- Politika vojne neutralnosti neće se mijenjati, poručio je Jeremić.

### Gdje su granice?

Ministar odbrane Bosne i Hercegovine Selmo Cikotić izjavio je za Oslobođenje kako ne smatra da takva politika Beograda, oličena i kroz posljednje Jeremićeve izjave, može uticati na promjenu stava naša zemlje prema nužnosti pristupanja NATO-u.

- Što se Bosne i Hercegovine tiče, ona ima pun konsenzus oko ulaska u NATO. Naravno, susjedi imaju uticaja, u slučaju BiH posebno, ali mislim da stav jedne države ne implicira stav druge. Kada je riječ o BiH, ne vidim nikakvog spora u formalnoj ravni. Hoće li suštinski biti, ostaje da se vidi. Ja ga ne očekujem, kazao je Cikotić.

Odgovarajući na pitanje gdje će biti granice NATO-a na jugoistoku Evrope, Cikotić je podsje-



Cikotić: Srbijanski stav ne mijenja položaj BiH

tio da su zemlje u regionu BiH, Crna Gora, Srbija, Kosovo i Makedonija ostale izvan NATO-a.

- Zavisno od tempa prijema tih zemalja formiraće se i granice NATO-a, izjavio je on.

Glavni tajnik Atlantske inicijative BiH Vlado Azinović kaže da izjavu ministra Vuka Jeremića ne treba smatrati konačnim stavom Srbije o budućnosti njenog odnosa prema Sjeveroatlantskom savezu. Odluku o tome hoće li se odlučiti za jače vezivanje uz NATO ili možda za ulazak u punopravno članstvo Saveza, Srbija će donijeti kada za to dođe vrijeme. Sada, očito, nije pogo-



NATO: Ko su sljedeće članice?

dan trenutak za takve odluke.

- Zbog zračnih udara na Srbiju 1999. tamošnja javnost je još vrlo senzibilizirana u odnosu prema NATO-u koji se doživljava i kao neprijateljski savez ili se, uz politički motiviran propagandizam, nastoji takvim prikazati. Uz to, Srbija već izvjesno vrijeme pokušava balansirati između ekonomskog i geopolitičkog oslonca na Rusiju s jedne, odnosno Evropske unije i NATO-a s druge strane. Odnos prema ponuđenim opcijama podijelio je i dio političkih elita u Srbiji, pa i ljude iz krugova bliskih predsjedniku Borisu Tadiću, rekao je Azinović za naš list.

Veli kako je jasno da odluka o dugoročnom opredjeljivanju između dva ponuđena sigurnosno-politička i ekonomska koncepta mora biti donesena pažljivo i u najboljem interesu Srbije, uz puni uvid u moguće dobiti i gubitke što ih nosi svaki od ponuđenih izbora. Položaj vlasti u Beogradu dodatno otežava pitanje Kosova, čiju neovisnost Srbija ne priznaje, ali joj takav stav nalaže dodatan oprez u ponašanju na međunarodnoj sceni.

Koliko je za Srbiju u ovom trenutku osjetljivo pitanje odnosa prema NATO-u, svjedoči nekoliko izjava koje su, u proteklih

## Inicijativa mladih Goraždana

# Želimo ulicu Srđana Aleksića

**Hrabri primjeri ne smiju biti zaboravljeni. Aleksić je jedan od rijetkih koji je u proteklom ratu dao i svoj život u želji da zaštiti prijatelja, bez obzira na njegovu nacionalnost, kaže Kerim Somun**

Mreža mladih Civitasa iz Goražda pokrenula je inicijativu da jedna od goraždanskih ulica ili lokacija dobije ime po Srđanu Aleksiću, mladiću koji je ratne 1993. u Trebinju nasmrt pretučen samo zbog toga što je branio život svog prijatelja druge nacionalnosti.

- Mi smatramo da je potrebno i u našem gradu nazvati jednu ulicu po Srđanu Aleksiću i mišljenja smo da se hrabri primjeri poput ovog pokojnog Srđana Aleksića ne smiju zaboraviti iz razloga što je on jedan od rijetkih u proteklom ratu dao i svoj život u želji da zaštiti svog pri-

jatelja, bez obzira na njegovu nacionalnost. Uzimajući u obzir da u Bosni i Hercegovini, kao i u zemljama okruženja, imamo dosta gradova koji su već dali svojim pojedinim ulicama naziv po Srđanu Aleksiću, MMC se nada da će nakon ove inicijative i naš grad kao i drugi gradovi kako u Bosni i Hercegovini, tako i u okruženju, cijeniti veličinu djela Srđana Aleksića, poklanjajući njegovoj ljudskosti ulicu koja će sa ponosom nositi njegovo ime, izjavio je Kerim Somun, koordinator MMC Goražde.

On kaže kako donedavno ni-

je znao mnogo o mladiću koji je bio glumac amater i plivačka nada bivše države. Međutim, kaže Somun, kada je čuo da je Aleksić ustao u odbranu prijatelja Alena Glavovića, kojeg su maltretirali srpski vojnici, te da je zbog toga izgubio glavu, ostao je fasciniran.

- On je život dao za prijatelja, a imao je tek 26 godina, dodaje Somun.

Aleksiću je posthumno dodijeljena Povelja Helsinškog komiteta za ljudska prava u Bosni i Hercegovini. Ulica Velikih drveta u Sarajevu, petnaest godina nakon Srđanove smrti,



Somun: Inicijativa upućena Općinskom vijeću

nazvana je po njemu. Uskoro bi i jedan prolaz u Foči trebao biti nazvan po Srđanu Aleksiću.

Hoće li i neka goraždanska ulica ili lokacija dobiti ime po hrabrom mladiću iz Trebinja, odluku će donijeti Općinsko vijeće.

A. H.



## Lagumdžija u Londonu

Dr. Zlatko Lagumdžija, predsjednik SDP-a BiH, tokom dvodnevnog boravka u Velikoj Britaniji je u odvojenim susretima razgovarao o budućnosti BiH i regiona jugoistočne Evrope sa čelnim ljudima Ministarstva vanjskih poslova, Laburističke partije, Konzervativne partije i Parlamenta Velike Britanije.

Predsjednik SDP-a se sastao i sa Timom Hitchensom, direktorom odjela za Evropu u MVP-u Velike Britanije. Ocijenjeno je da inicijativa srbijanskog predsjednika Borisa Tadića za Rezoluciju o genocidu u Srebrenici može predstavljati dobar i pozitivan signal za cjelokupnu regiju. Pozdravljena je inicijativa Španije kao predsjedavajuće Evropske unije o održavanju međunarodne konferencije posvećene reformskom katalogu obaveza za BiH i region u cjelini, te inicijativa Austrije i Grčke o 2014. koja bi mogla biti obilježena kao godina pune integracije zapadnog Balkana u EU i NATO.

Posebno je izdvojena potreba da BiH što prije dobije liberalizaciju viznog režima, jer izostavljanjem sa bijele šengen liste Evropska komisija je kaznila građane naše zemlje, a ne vladajuću koaliciju koja je direktno odgovorna za ovakvo stanje u zemlji, saopćeno je iz SDP-a.

## Delegacija Egipta u Sarajevu

Ministar vanjskih poslova Bosne i Hercegovine Sven Alkalaj sastat će se sutra u Sarajevu sa ministrom vanjskih poslova Arapske Republike Egipat Ahmedom Aboulom Gheitom, koji će predvoditi delegaciju Egipta tokom zvanične posjete našoj zemlji.



## Sudar: Kriza morala

Pomoćni biskup vrhbosanski Pero Sudar ocijenio je da su ekumenizam i vjerski dijalog u BiH nedovoljno uvjerljivi zbog manjka iskrenosti i hrabrosti u otvaranju autentičnih teoloških tema.

On je rekao da se sve svelo na političko-socijalni i folkloro-reklamni nivo i izrazio sumnju da takav dijalog može bitno uticati na stanje u društvu.

"Na vjerskom nivou nam treba otvorenog vjerskog razgovora i nepatvorenog ljudskog prihvatanja utemeljenog na teološkim odrednicama i usmjerenog na podizanje duhovnog nivoa življenja naših opravdanih različitosti u nužnosti zajedništva", rekao je Sudar za Nezavisne novine.

On je naveo da se "sjeme krize morala u društvo bezobzirno sije već decenijama" i da ne čudi njegova zastrašujuća zastupljenost u svim sferama života.

# Jeremića u Munchenu ova i NATO-a

● BiH ostaje odlučna na putu prema NATO-u, tvrdi ministar odbrane naše zemlje Selmo Cikotić



## Šutanovac: Slike prošlosti

U tekstu pod naslovom "Ulazak Srbije u NATO", pisanom za CorD, mjesečnik na engleskom jeziku koji izlazi u Beogradu, ministar odbrane Srbije Dragan Šutanovac, uz ostalo, kaže: "Ipak, u svim promenama koje ističem, u odnosima Srbije sa NATO-om najvažnija je promena svesti i prizme kroz koju gledamo jedni druge. Činjenica je da u određenim strukturama NATO-a i danas postoji "zamrznuta slika" u odnosu na Srbiju, koju i dalje vide kao Miloševiću Srbiju iz devedesetih godina, dežurnog krivca za sve probleme u regionu. S druge strane, i u Srbiji određen deo javnosti smatra da je NATO antisrpski orijentisan, jer je bombardovao Srbiju 1999. i oduzeo joj Kosovo i Metohiju. Nažalost, tu se uglavnom radi o pokušaju prikrivanja nesposobnosti i nekompetentnosti onih političara koji iza sebe nemaju prave rezultate. Zato je takvima NATO omiljena tema, jer stalnim vraćanjem na prošlost skreću pažnju sa činjenice da nemaju šta da ponude za budućnost."



samo nekoliko dana, stigle sa vrlo važnih adresa. Azinović podsjeća da je prvo u autorskom tekstu u časopisu CorD 4. februara 2010. ministar odbrane Dragan Šutanovac ocijenio da je za opredjeljivanje Srbije da li će biti članica NATO-a potrebna "racionalna analiza", te naglasio kako je dobro što se u Srbiji "kroz dijalog o članstvu u NATO-prelazi sa isključivo emotivne vezanosti za prošlost na racionalne diskusije okrenute budućnosti zemlje."

- Ministar Šutanovac je, također, rekao kako su NATO i Vojska Srbije od dvije zaraćene strane sada postali partneri čija

je suradnja jedan od stupova sigurnosti u regiji. Samo dva dana kasnije oglašio se predstavnik Rusije pri NATO-u Dmitrij Rogozin, koji je izjavio kako "ne razumije dio srbijanske političke političke i vojne elite koja želi ulazak Srbije u NATO". U intervjuu za beogradski Blic, Rogozin je upozorio Vladu u Beogradu da će se morati odrediti Kosova bude li željela zemlju uvesti u NATO jer Alijansa, kako je rekao, "može primiti Srbiju samo u novim granicama, odnosno bez Kosova". U tom kontekstu, trebalo bi promatrati i posljednju izjavu ministra vanjskih poslova Srbije Vuka

Jeremića, koji je nakon Rogozinog upozorenja objavio kako Srbija "neće činiti korake koji vode ka svrstavanju u NATO, niti neki drugi vojni ili obrambeni savez". U svakom slučaju, radi se o odnosima koji zaslužuju znatno širu i ozbiljniju analizu, kazao je Azinović uz napomenu da će i Atlantska inicijativa tom problemu posvetiti značajan prostor u prvom broju svog časopisa Demokracija i sigurnost u jugoistočnoj Evropi, koji će izaći idućeg mjeseca.

## Politika susjeda

NATO je 1949. osnovalo 12 zemalja članica tadašnjeg za-

padnog bloka. Danas je u njegovom sastavu 28 država, a iz našeg najbližeg okruženja Slovenija, Hrvatska i Albanija. Zbog neriješenih političkih problema, BiH je koncem prošle godine na sastanku ministara vanjskih poslova Sjeveroatlantskog saveza u Bruxellesu dobila odbijenicu za prijem u Akcioni plan za članstvo u NATO-u. No, to nije dovelo od promjene stava BiH o učešću u evroatlantskim integracijama. BiH, Srbija i Crna Gora, koja je dobila MAP, sudjeluju od 2006. u NATO-ovom programu Partnerstvo za mir.

## Politička akademija SDA



Učesnici političke akademije

- U edukacijskom programu, pored članova SDA, učestvovali predstavnici PDP-a i HDZ-a BiH
- Predavači Zoran Tomić, Miloš Džajić, Besim Spahić, te Erhard von der Bank

Politička akademija SDA, u saradnji sa Centrom za evropske treninge pri Evropskoj narodnoj stranci iz Brisela, organizirala je od 10. do 14. februara u Sarajevu stručni seminar pod nazivom "Politička komunikacija i marketing u kampanji". Na ovom edukacijskom programu su, pored članova SDA, učestvovali i predstavnici ostale dvije stranke iz EPP grupacije iz naše zemlje - HDZBiH i PDP, uku-

pno njih 40. Predavači su bili istaknuti komunikolozi i menadžeri kompanija iz BiH, Hrvatske, Srbije, te Budimpešte i Bruxellesa.

"Politička akademija SDA, kao prvi projekt ovakve vrste u našoj zemlji, jedini je partner Evropskoj narodnoj stranci u realizaciji programa edukacije i osposobljavanja unutar političkih stanaka. Iskustava koja su učesnici čuli na ovom

# Podrška evropskih partnera

seminaru od najboljih menadžera kampanja iz regiona, poput prof. dr. Zorana Tomića, mr. Miloša Džajića (Centar modernih vještina iz Beograda), prof. dr. Besima Spahića, te naših gostiju iz EU dr. Erharda von der Banka, direktora CET-a i drugih, zasigurno će biti od koristi za demokratizaciju našeg društva, posebno u ovoj izbornoj godini. Također, podrška naših par-

tnera iz EU je od ključne važnosti za našu zemlju, posebno u procesu liberalizacije viznog režima - što je jedno od najvažnijih pitanja za sve građane naše zemlje", kazao je Senad Šepić, potpredsjednik SDA i direktor Političke akademije SDA.

Programi ove stranačke edukacijske organizacije biće nastavljeni u martu ove godine, najavljuje se.